

Headlines

- प्रधानमंत्री नरेंद्र मोदी होरें आखेआ ऐ जे लोकें अर्थ बवस्था ते नमिएं काहडें च निवेश विकसित भारत दी रूप रेखा गी परिभाषित करदा ऐ।
- विधानसभा च उप राज्यपाल मनोज सिन्हा हुंदे अभिभाषण पर चर्चा परतिए शुरू होई।
- जम्मू-कश्मीर च बददी नशे दी कबैतू पर विधायकें चिंता जाहिर कीती। सेहत मंत्री सकीना इत्तू होरें इस कबैतू कन्नै निब्बड़ने आस्तै सांझे जत्तें दा आह्वान कीता।
- उपराज्यपाल मनोज सिन्हा होरें श्री अमरनाथ जी श्राइन बोर्ड दी 48मीं बैठक दी अध्यक्षता कीती। जात्तरा 3 जुलाई थवां शुरू होग।
- राइजिंग स्टार कोर दे जी.ओ.सी होरें जम्मू च सांझा सुरक्षा सम्मेलन दी अध्यक्षता कीती। सुरक्षा ते कारवाइएं च आपसी तालमेल पर जोर पाया।

<><><><><><>

PM-Webinar

प्रधानमंत्री नरेंद्र मोदी होरें आखेआ ऐ जे सरकार नै निवेश च बुनियादी ढांचे ते उद्योगें गी जिन्नी तरजीह दित्ती ऐ, उन्नी गै प्राथमिकता लोकें, अर्थ बवस्था ते नमिएं काहडें गी बी दित्ती ऐ। वीडियो कांफ्रेंसिंग राएं रोजगार पर बजट मगरा आहले इक वेबीनार गी संबोधित करदे होई मोदी होरें आखेआ जे लोकें च निवेश दा लक्ष्य त्रै थम्मैं शिक्षा, कौशल ते सेहत सेवा पर टिके दा ऐ। निवेश बारे गल्ल करदे होई उनें आखेआ। मोदी होरें आखेआ जे इस बजट च घरेलू ते अंतरराष्ट्रीय सैलसफा गी बढ़ावा देने लेई केई फैसले लैते गेदे न। उनें आखेआ। प्रधानमंत्री होरें घोषणा कीती जे मुल्लै च 50 थाहरें गी सैलसफा गी ध्यानै च रक्खदे होई विकसित कीता जा'रदा ऐ। इनें इलाकें च ढांचागत सुधार कन्नै इलाके च सैलसफा च बाढ़ा होग ते मुकामी सतह पर रोजगार पैदा होग।

<><><><><><>

LG-Address Discussion

जम्मू-कश्मीर विधानसभा च उपराज्यपाल हुंदे संबोधन आस्ते धन्नवाद प्रस्ताव पर अज्ज दुए दिन बी चर्चा जारी रेई। राज्य दे दर्जे दी बहाली, सिंधु जल संधि, सरकारी विभागें च भर्तियां, आरक्षण नीति गी सब्भनें लेई बरोबर बनाना, बिजली परियोजना गी वापस लेआना जनेय मुद्दे पर वाद-विवाद चलाया। सुरजीत सिंह सलाथिया होरें जिला स्तर पर मुख्मन्त्री हुंदी तरफा बजट बारे सलाह मश्विरा करने दी प्रशंसा कीती। डॉ. बशीर अहमद होरें लोकें दे हक्कें दे बचाव ते विकास सरबन्धत जरूरतें पर जोर पाया। तोआई, गुलाम मोहिउद्दीन मीर होरें बेरोजगारी पर चर्चा कीती। दुए सदस्यें इक्कजुट होइयै प्रशासनिक बदलाव दी गल्ल कीती तां जे लोकें कन्नै कीते गेदे वादे पूरे कीते जाई सकै।

<><><><><><>

JKLA-Drug Abuse

विधानसभा दे प्रश्नकाल दे दौरान अज्ज जम्मू-कश्मीर विधानसभा सदस्यें नशाखोरी दे गंभीर मसलें पर चिंता जाहिर कीती ते स्पीकर अब्दुल रहीम राथर होरें'गी आखेआ जे नशाखोरी दी रोकथाम सरबन्धी उपायें पर सुझा मंग्गने ताई चर्चा कराई जाए। किश विधायकें इस बारे जांच आस्तै माहिरें दे पैनल ते इक हाउस कमेटी दी मंग कीती। सेहत मंत्री सकीना इत्तू होरें इस मसले दी गंभीरता गी स्वीकार कीता ते ऐसी सामाजिक चुनौती दा सामना करने आस्तै इक्कजुट कोशिशें पर जोर पाया। इलाज ते पुनर्वास सहूलतें बारै दसदे होई मंत्री होरें आखेआ जे जम्मू च 9 एडिक्शन ट्रीटमेंट सुविधां न जित्ये नशे दी लत गी छुड़ाने आस्तै

ईलाज कीता जंदा ऐ। एहू सुविधा सारे 20 जिलें च ओ.पी सेवां सने उपलब्ध ऐ। सकीना इतू होरें नशा मुक्त अभियान दे सकारात्मक प्रभाव बारै बी दस्सेआ जिस करी नशाखोरी दे मामलें च किश गिरावट आई ऐ।

<><><><><><>

Rana-Pani Samati

जल शक्ति मंत्री जावेद अहमद राणा होरें विधानसभा गी जानकारी दित्ती ऐ जे श्री माता वैष्णो देवी हल्के च 35 पानी सप्लाई स्कीमां जां ते मुकम्मल होई चुकी दियां न जां फही जैरे-तामीर न तां जे हर कुसै गी नलके राएं पीने आह्ला पानी उपलब्ध होई सकै। एहू गल्ल मंत्री होरें श्री माता वैष्णो देवी हल्के थवां विधायक बदलेव राज शर्मा हुंदे आसेआ पुच्छे गेदे सोआलै दे परते च आक्खी। उनें आखेआ जे जल जीवन मिशन तैहत 91 पानी समिति कमेटिएं च 50 फीसद महिलाएं दी नुमायंदगी ऐ। मंत्री होरें बरखा दी कमी करी पानी दी किल्लत आहले मामले गी बी उजागर कीता। उनें पानी दे संरक्षण, बरखा दे पानी गी बचाने पर जोर पाया।

<><><><><><>

LG-Amarnath

उपराज्यपाल मनोज सिन्हा होरें श्री अमरनाथ जी थ्राइन बोर्ड दी 48मीं बैठक दी अध्यक्षता कीती। एहू बैठक राजभवन च लग्गी। इस बरे श्री अमरनाथ जी दी जात्तरा 3 जुलाई गी शुरू होग। एहू जात्तरा 3 जुलाई गी दौनें रस्ते पैहलगाम ते बालटाल आहले रस्ते राएं शुरू होग ते 9 अगस्त गी रक्खड़ पुन्नेया आहले दिन सम्पन्न होई जाग। बैठक दौरान कई सारे महत्वै आहले मामलें पर चर्चा कीती गेई जिंदे च श्रद्धालु लेई सुविधा गी जम्मू ते श्रीनगर सने होरनें दुइएं थाहरें पर बदाना, ई-के.वाई.सी कायम करना, आर.एफ.आई.डी कार्ड जारी करना ते मौके पर पंजीकरण करोआने जनेहू मामले शामिल हे।

<><><><><><>

GoC-Jammu

क्षेत्रीय सुरक्षा गी बढ़ावा देने दे मकसद कन्नै राइजिंग स्टार कोर दे जी.ओ.सी होरें जम्मू च सांझा सुरक्षा कांफ्रेंस दी अध्यक्षता कीती। एहूदे च सेना, बीएसएफ, सी.आर.पी.एफ, जम्मू-कश्मीर पुलिस ते खुफिया एजेंसिएं दे आला अफसरें हिस्सा लैता। इस दौरान मुख् करी ध्यान सुरक्षा ते कारवाइएं दौरान ताल मेल पर दित्ता गेआ। एहूदा मकसद आपसी तालमेल गी बढ़ावा देना, सूचनाएं दे आदान-प्रदान गी सुचारू बनाना ते बदा'रदी सुरक्षा चुनौतिएं कन्नै निब्वडने आस्तै रणनीतियां बनाना।

<><><><><><>

Young Scientist Udhampur

उधमपुर थमां 2 युवा साईंसदानें सरस शर्मा ते मृदुल खजूरिया नै इक बड्डी उपलब्धि हासल कीती ऐ। इनें पहाडें च जात्तरा सरबंधत सुरक्षा गी बढ़ाने दे मकसद कन्नै इक नमा अविष्कार विकसित कीता ऐ, जेड़ा खास करियै दिक्खने च अक्षम लोकें लेई मददगार होग। एहू अविष्कार आई.आई.टी दिल्ली ते एन.आई.टी श्रीनगर च दस्सेआ गेआ जिसी खासी प्रशंसा थहोई। ऐसी नमीं उपलब्धि कन्नै अटल टिकरिंग लैब्स नां दी पैहल दी सफलता दा पता लगदा ऐ जेदे कन्नै छात्रें च रचनात्मकता ते नमेपन जनेय हुनरें दा विकास हुंदा ऐ। अंतरिक्ष ते तकनीकी राज्यमंत्री डॉ. जतिंद्र सिंह होरें अविष्कार दी तरीफ कीती। आकाशवाणी समाचार कन्नै गल्लबात करदे होई सरस शर्मा नै आखेआ। मृदुल खजूरिया होरें बी इस मौके अपने विचार सांझा कीते।

<><><><><><>

Poonch-Dairy

पुंछ च डेयरी सैक्टर गी बढ़ावा देने दे जत्त तैहत दुध किट्टा करने आहले 2 आटोमैटिक यूनिट्स दा उद्घाटन हवेली तहसील च कीता गेआ। इसी खनेत्तर डेयरी सहकारी समिति ते आप सहायता समूहें आसेआ कायम कीता गेआ। एहू सब किश राई-बाई दे पूरे-पराते विकास सरबंधी कार्यक्रम तैहत होआ ऐ। जिला विकास आयुक्त विकास कुंडल ते मुख् पशु पालन अधिकारी डॉ. शेख मोहम्मद युनस हुंदे आसेआ एहूदा उद्घाटन कीता गेआ। एहूदा मकसद डेयरी सरबंधी ढांचे गी बढ़ाना, ग्रामीण रोजगार गी बढ़ावा देने ते दुध दे म्यार गी बढ़ाना ऐ। आकाशवाणी समाचार कन्नै गल्ल करदे होई पुंछ दे डिप्टी कमिशनर विकास कुंडल होरें आखेआ।

<><><><><><>

Balgram-Charitable Home

बच्चें आस्तै चैरीटेबल होम-बाल ग्रांउ बरे 2025 आस्तै आवेदन मंगगा'रदा ऐ। बाल ग्रांउ च 5 थमां 10 बरे बश्कार बच्चें गी जेडे के 5 जहार रपे म्हीने आमदन आहले गरीब परिवारें दे हैन, गी मुफ्त रौहने, खाने, पढ़ाई ते सेहत सुविधा दित्तियां जंदियां न। बच्चें जिंदे मां-पेयो नेई हैन, जां परिवार उन्दी पढ़्याई दा खर्च नेई चुक्की सकदा, उनेंगी बाल ग्रांउ च प्राथमिकता कन्नै शामिल कीता जंदा ऐ। दाखिले आस्तै आवेदन जरूरी दस्तावेजें कन्नै 24 मार्च, 2025 तोड़ी जमा करवाए जाई सकदे न। मती जानकारी आस्तै प्रो. आर.डी शर्मा हुंदे कन्नै संपर्क कीता जाई सकदा ऐ। नंबर ऐ 9086201601

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>